

Mazzë e Panellë...

Cë štèa na vota na famiglia assà unurata. U maritë facèa u muratorë, éva nu buonë fatijatorë e tuttë u chiamavënë a fatijà. La mogliéra accudiva la casa e facèa cacché fatiuccia a maglië. Tënëanë nu figlië sulë, chë jva a la scola. Finchè u brav'omë è statë buonë dë salutë tuttë fëlava liscë, ma nu juornë 'štu povërë omë z'ammalattë dë nu bruttë malë e funettë rent'a u spëralë.

A u spëralë lë miérëcë cërcannë dë curarlë finchè putënnë, ma po' a la finë, quannë vërënnë ca nn'avëanë cchiù chë fa, u rëmannannë a la casa.

Campattë cacchè autë mesë rent'a nu funnë 'è liëttë e po'... zë në jëttë a ll'autë munnë, lassannë la mogliéra e u figlië, ca jva a la scola, sènza la crocë dë na lira. La povëra mamma jv'arrangiannë la jurnatëlla kë cacché fatiëlla pë cërcà dë méttë nu tuozzërë dë panë a tàula. Ma, spissë nnë riusciva manchë a rëcrënë lë soldë pë pajà la bullëtta dë la lucë.

U figlië ca suffriva pë la povëra mamma ca zë dëspëràva pë la paccarija, zë sëntiva murtëfëcatë 'nnantë a lë cumpagnë e lassattë la scola e jëttë a cërcà fatija. Jëttë a tuzzërà parëcchië portë, ma évënë cchiù lë juornë ca nnë truavë niëntë ra fa, chë chillë c'arrangiavë cacché soldë.

Mo capëtattë nu juornë chë 'šta povera famiglia nnë tënëa niëntë da magnà, allorë u giovënë scëttë da la casa cundicënnë ca jva a vërë së truavë d'arrangià caccosë.

Dopë na méz'ora, zë rëtëratte kë nu bellë piëzzë 'è furmaggë e u mëttëttë a taula e magnattë issë e la mamma.

U juornë dopë, zë rëtëratte a la casa kë nu bellë pullaštrë. La mamma l'addumannattë addò zë l'éva 'bbuscatë llu pullaštrë e issë arrëspunnëttë: " magnë ' 'ntë në 'mpurtà".

N'au tu juornë purtattë nu bellë sciallë .

La povëra fëmmëna l'addumannattë d'addò mëniva e issë arrëspunnëttë: " tè piacë ma', mittatëllë e ntë në 'mpurtà".

Insomma ogni juornë u figlië rëpurtavë la grazia 'è Ddijë a la casa.

La povëra mamma 'ncumënzattë a magnarzë la foglia e chiërëv'a u figlië d'andò mëniva chëlla rrobba, ma u figlië rëpëtëva " 'ntë në 'mpurtà".

Na matina, u figlië zë në scëttë cumm' a u solëtë.

La mamma rëzëlattë la casa e z'asseëtattë, cummë zë usava, 'nnant'a la casarëlla a fa la cauzëtta iniziëmë a la vicina rë casa.

Mëntre ciacianiavënë tra lorë, la fëmmëna auzë l'uocchië e vërë da luntanë ddu' carbuniërë chë passavënë 'nziëmë a u figlië.

Quannë lë carbuniërë arrëvannë vicinë a lorë , u figlië addumannattë u përmëssë dë putë salutà la mamma e chistë ddu' ciu dënnë.

Allora u figlië jëttë a 'bbraccià a la mamma e lë ricëttë rént'a la rëcchia: Ma', m'aviss'accisë e mazzatë quannë rëpurtavë u furmaggë la prima vota, mo' nnë jssë carcëratë! La vasciattë e zë në jëttë mmiez'a lë ddu' carbuniërë c' u purtannë a u carcërë.

La povëra mamma scuppattë a chiagnë e a murtëfëcarzë, allora la vicchiarëlla
chë fëlavë la cauzëtta inziémë a éssa, mënattë la tèrza: è proipëta vérë ca mazzë
e panëllë fannë lë figlië bèllë!

2009